

Desaroyo: Nazinan tambe a cuminsa asina: "Movecion sentido comun" ta un sentido di locura peligroso

ORANJESTAD(AAN) Ciertu desaroyonan den comunidad na Aruba ta muestra cu manipulacionnan peligroso ta worde haci cu emocionnan y tolerancia den pueblo, pa asina crea agitacion racial y discriminatorio contra tur loke ta extranhero na Aruba.

Un grupo cu ta yama nan mes "Movimento Sentido Comun" a parti loke nan ta yama un comunicado di prensa rond, den cual nan ta agita contra extranheronan legal y ilegal na Aruba.

Na Aruba ta hende tin libertad di expresion, pero e libertad aki no ta duna ningun hende o grupo un sorto di carta blanco pa asina agita y bay contra cierto gruponan den comunidad y peor si ta trata di actonan racista y discriminatorio.

Si mester lesa bon loke comunicado di prensa di Movimento Sentido Comun ta propaga den pueblo, no por saca otro conclusion cu ta trata aki di algun hende cu ta forma parti di un grupo di hendenan frustra y cu a perde tur nocion di respet y realidad

di bida y ta canando riba un caminda hopi peligroso cu no ta nada bon pa pais Aruba y su pueblo.

Na Alemania den añanan 1930 bay ariba tambe e "Brühemden" di Hitler su partido a cuminsa agita pueblo Aleman contra tur loke tabata Hudio, gitano, extranhero y homosexualnan pa despues persigui tambe esnan mentalmente retarded y te hasta handicapnan pa e Holocausto plama rond Europa pa asina masacra miyones di hendenan inocente.

E situacion economico y politico na Aruba actualmente ta forma e base ideal pa gruponan frustra cu kier agita pueblo pa asina fomenta racismo y discriminacion racial, manera cu a pasa rond mundo na paisnan caminda cos no tabata bay bon y historia ta repitiendo.

Un frase den e comunicado ta bisa textualmente lo siguiente: "Ban caba cu e abuso social y e decadencia

moral causa door di e presencia exagera di extranheronan Legal y Ilegal riba nos pais".

Na prome lugar cualkier grupo den comunidad cu kier bay contra hendenan cu ta biba legalmente na Aruba ta bay contra ley y ta bay contra tur norma di etica, decencia y respet pasobra hendenan cu ta biba legal na Aruba ta haya e mesun derecho y proteccion cu leynan na Aruba ta duna na tur otro hende sin distincion di rasa, color o religion.

Na di dos lugar ta hopi peligroso pa bisa cu ta extranheronan legal y ilegal ta esnan cu a causa abuso social y decadencia moral pasobra ta ken por bay sinta riba stoel di huez pa acusa otro hende manera cu e grupo cu ta yama su mes Sentido Comun ta haci, sin cu nan ta bin cu pruebanan duro y palpable y riba dje nan ta generaliza?

Ta di unda e hendenan aki ta kere cu nan ta saca e autoridad y e derecho di por bay hunga un sorto di huez pa as-

ina stigmatiza y persigui hendenan cu no ta di Aruba?

Awor nan kier saca tur extranhero di Aruba! Hitler tambe a priminti e pueblo Aleman cu nan lo caba cu tur Hudio na Alemania pa asina duna e pueblo di Alemania loke supuestamente tabata di nan, pa despues nan por a cuminsa cu e seleccion di pureza di rasa y ta den e direccion ey Aruba tin cu bay pa asina satisfice e sed di venganza di un grupo di hendenan frustra?

Hitler tambe tabata un persona frustra cu poco hende a dedica atencion na dje pa despues miyones di hende rond mundo lamenta cu nan no a actua contra dje na tempo.

Bao di e capa di ta contra corrupcion y tur sorto di bagamunderia cu ta andando na Aruba, e grupo aki kier haci como si fuera nan ta bay salba e pueblo door di implementa odio y rencor racial y discriminatorio den pueblo di Aruba.

Partidonan politico y gremionan na Aruba tin e tarea moral y etico pa combati loke no ta bon den politica y otro instancianan legal y competente tin e tarea pa persigui tur esnan cu ta viola ley y no cu awor mester bay tras di un grupo di hendenan cu ideanan peligroso cu ta fomenta racismo den pueblo y cual grupo por crece bira un monster cu lo hinca pais Aruba den un abismo sin fin.

Awe ta extranhero y mayan ta bay selecta Arubianonan mes riba color y procedencia di na mayornan pa asina bay crea e rasa Arubiano puro manera cu Hitler tambe tabata kier a haci cu su rasa Germano di hendenan cu wowo blauw y cabey blond?

Esnan cu ta duna atencion incondicional na e grupo aki door di duna nan cobertura sin filtra e peligro grandi cu tin tras di cortina, ta haci nan mes culpable na racismo y discriminacion racial.

Recibonan halto di awa mester worde regla na WEB

ORANJESTAD(AAN) Redaccion di DIARIO a haya diferente keho di hendenan cu lo a haya recibonan di awa cu a bin e ultimo luna aki mas halto cu normalmente ta e caso.

Tin clientenan di WEB cu tabata bisa cu nan a haya recibonan di awa cu tabata suma 600 pa 700 Florin siendo cu normalmente nan ta paga 130 pa 150 Florin pa luna.

Hendenan tabata puntra si ta prijs di awa a subi sin cu pueblo a ser poni na altura pasobra mirando cu gobierno a anuncia cu medidanan ta worde tuma, tin hende a kere cu esaki ta conta tambe pa prijs di awa.

Segun informacionnan cu DIARIO a haya di WEB, no tin aumento di prijs di awa y tur hende cu a haya un recibo di cual nan ta duda, ta worde suplica pa pasa na oficina di WEB pa un ke otro por worde controla y regla.

MEXICO MI LO COMEBO CURU!!

